

PLKN 3.0 corak generasi muda berjiwa patriotik

Oleh **Essa Abu Yamin** - Jun 26, 2025 @ 9:00am

essabuyamin@bh.com.my



Program Latihan Khidmat Negara (PLKN) 3.0 bukan lagi sekadar latihan fizikal dan disiplin semata-mata, sebaliknya merupakan inisiatif strategik dalam membina jati diri serta memperkasakan generasi muda negara dengan semangat patriotisme dan perpaduan sejati.

Ketua Pengarah Jabatan Latihan Khidmat Negara (JLKN), Mejar Jeneral Datuk Ya'cob Samiran, berkata PLKN versi baharu itu digariskan sebagai mekanisme utama dalam mendepani cabaran sosial serta geopolitik yang kian kompleks.

"Melalui PLKN 3.0, golongan muda bukan hanya dilatih dengan ilmu ketenteraan asas, malah lebih penting, mereka dididik dengan nilai cinta negara, perpaduan dan kesukarelawanan; tiga teras utama kepada kestabilan dan kekuatan sesebuah negara.



Pelatih PLKN menjalani latihan menembak di Lapang Sasar MAWILLA 1 TLDM Tanjung Gelang, Balok, Kuantan. NSTP/Muhammad Delima Atan

"Fokus utama JLKN bersama Kementerian Pertahanan (MINDEF) kini adalah memperjelaskan kepada ibu bapa serta masyarakat umum mengenai kepentingan program berkenaan dalam konteks keselamatan dan pertahanan negara, selain usaha membentuk generasi berjiwa kenegaraan," katanya kepada BH.

Beliau berkata, pembabitan ibu bapa amat penting dan apabila mereka memahami matlamat program berkenaan, anak mereka bukan sahaja lebih berdisiplin, tetapi turut dilengkapi dengan semangat keprihatinan sosial.

Ini membolehkan sokongan terhadap PLKN 3.0 akan terus kukuh.

"Pelaksanaan PLKN 3.0 dirangka dalam empat fasa utama yang bertujuan melahirkan generasi muda berjiwa patriotik, berdisiplin dan bersedia menyumbang kepada negara.

"Fasa pertama dikenali sebagai Fasa Pengenalan (PraPLKN) yang dilaksanakan kepada murid Tingkatan 4 sebagai pendedahan awal dan persiapan mental terhadap konsep latihan khidmat negara yang bakal mereka jalani selepas tamat persekolahan," katanya.

Jelasnya, fasa seterusnya diikuti Fasa Latihan Asas iaitu pelatih akan mengikuti latihan ketenteraan asas dan modul kenegaraan secara intensif.

"Mereka yang menamatkan fasa berkenaan akan diberikan pengiktirafan sebagai Anggota Khidmat Negara (AKN).

"Dalam Fasa Latihan Khusus, anggota AKN akan menjalani latihan lanjutan bersama agensi kerajaan berkaitan, bagi membolehkan mereka bersedia melaksanakan peranan sebagai sukarelawan dalam pelbagai bidang termasuk kebajikan, pengurusan bencana dan kemasyarakatan," katanya.

Fasa terakhir katanya, Fasa Khidmat Negara dan ia akan membabitkan anggota AKN menyumbang tenaga dan kepakaran secara langsung dalam situasi atau keperluan khas negara yang memerlukan khidmat mereka.

"Fasa itu dikendalikan sepenuhnya oleh JLKN dan berfungsi sebagai platform menyatukan khidmat sukarelawan belia di bawah satu sistem penyelarasan yang tersusun dan berkesan.

"Walaupun program itu diperuntukkan kepada belia berumur 17 hingga 35 tahun, pelaksanaan awalnya akan membabitkan hanya daftar kelahiran tahun 2007, iaitu dalam lingkungan umur 18 hingga 19 tahun," katanya.



Pelatih hadir pada sesi pendaftaran pelatih (Wanita) PLKN 3.0 di Kem Regimen 515 Askar Wataniah, Kuala Lumpur. NSTP/Hairul Anuar Rahim

Latihan lebih tersusun

Ya'cob berkata, PLKN 3.0 membawakan komposisi latihan yang lebih tersusun dengan 30 peratus modul kenegaraan dan 70 peratus latihan ketenteraan.

"Modul kenegaraan memberi penekanan kepada pemahaman sejarah, sistem pemerintahan, dasar keselamatan dan kepentingan perpaduan dalam masyarakat majmuk, seterusnya memupuk kesedaran sivik dan tanggungjawab sebagai warganegara.

"Sementara itu, latihan ketenteraan yang meliputi kawad, asas pertahanan diri, disiplin ketenteraan serta latihan fizikal dan kepimpinan pula membentuk daya tahan mental dan fizikal peserta.

"Gabungan kedua-dua elemen itu menjadikan PLKN 3.0 satu platform bersepadu untuk melahirkan generasi muda yang bersedia dari segi fizikal, mental dan emosi bagi menghadapi cabaran masa depan," katanya.

Menurut Ya'cob, PLKN 3.0 turut dirangka berdasarkan kesedaran, belia adalah ejen perubahan dan aset utama negara.

"Masa depan belia adalah cerminan masa depan negara. Maka penting untuk kita membentuk jati diri mereka sejak peringkat awal agar mereka mampu berdaya saing dan menyumbang secara aktif kepada pembangunan negara.

"Dengan kerjasama semua pihak termasuk ibu bapa, sekolah, agensi kerajaan serta masyarakat umum, pelaksanaan PLKN 3.0 mampu melahirkan generasi muda yang mempunyai semangat kenegaraan kental serta bersedia berbakti demi Malaysia," katanya.

Katanya, matlamat utama JLKN adalah untuk membentuk generasi muda yang patriotik, berdisiplin dan bersatu, demi masa depan negara lebih gemilang.